



Abbottabad nung shiba anguar
US-i mamatoktsüla: S Jaishankar

Gaza City nung ayawara ya
meimchir tamakok: UN chief

NPGs, Tribal Hohos & FNR ajanga meraksatetba telungjem külem tenangzükba sangdong

Ungma, 23 Aug (TYO): Forum for Naga Reconciliation-i achayanga aser Ao Senden-i jazüka Ungma yimdak Rural Assembly Hall nung Council of Naga Cooperation and Relationship (CNCR) senden takok ngua menogo. Iba senden nüngtem nung anogo ananü yim süngküm shibanger aküm tulu ketja mungtsü.

Iba senden nung FNR nungi züngsemtem den Myanmar dak alaka Naga litsü ajak nungi Naga Tribal Hoho balala 34 aser NPGs telok balala 16 nungi lenirtem adenshia shilem tajung agia aden. Iba anogo (August 23, 2025) ya Naga nübur “külem tarutsü” asoshi lungjemba tamaitü “takok anogo” ka lir, ta FNR Convenor, Rev. Dr. Wati Aier-i senden temer osangzülurtem dang senden lemtet lemsatetpdang metetdaksü.

January 14, 2025 nungi tenzüka senden balala mena maneni tenangzüktep aser bangzüng balala renema kin Hohos tenungitba nung, Naga nunger putiotsü aser temeten dak ajemdaker Naga Political Groups balala dang külem taginüba yimden nükjidong ka asoshi arok sabang ka nung lungjemtsü süoki ia inyakdar. Iba nükjidongji senmanga aruba ka dang masü saka taginüba maneni akangshia arur, ta FNR tayonger metetdaksü.

Iba telungjem senden ya jeli telatetba kecha meli-i aser joko asenok telungjem raksatsüsa jembia arubatem kecha medeni aotsü sangdonger. Asenok tarutsü lenmangji kecha agia menokdangtetba , telungjem inyaksü tasü itetba, angatsü tangatetba shisatsü aser mapa küma inyaksü mulungtetba asütsüla, ta pai ashi. CNCR ya ochi sabang ka nung jangjajangja noktaka lir, nübur aser Tsüngrem

tenüng nung tanü tenangzükba agiba ya shinga teloki anua/tashi meiti kümdaktsütsü memerangtsüla, ta paisa shisem.

Iba sangdong ya kuli küptok ka amai yangluba masü saka ibai tenangzüktep ka lir. Nüburtemi joko lemdanger melinüba agi lungjemer ola adoktsü shimer, kadi ka tai tokteptsü aser kadi ka agizükteptsü, tesüiba pututem nung taküm bendanga agütsüba mapatem akümtsüba agizükteptsü, külemi jaja aser tarutsü akümket, ochi, aser yimjung asoshi inyaksü. Tanü telungjem sangdong ya tangatetba takang nung renemba ka lir, ibai tajangshiba jenti nung ajemdaker tarutsü nung külemi yimjiyimjung nung alitsü teimla nung renemba ka lir, ta paisa metetdaksü.

Anungji, “tanü Honibarnü, August 23, 2025 Ungma yimdak, onok NPGs, Tribal Hoho-tem aser FNR ajanga meraksatetba telungjem külem tenangzükba ya ajangajanga ayimoktsür aser Naga nungeri iba anogo ya lemsaba melen telungjem, taoba mangatettep melena tarutsü alizüng penzüba, tetsüba melena tarutsü teimla shimba mapang südaktsüdi. Anungji, tanü onoki Naga nungerji ka dang ta nangzüka sangdonger. Tsüngrem asenok teyarir sangma!”, ta paisa moaja metetdaksü.

Bendang balala nungi telok balala iba sendeni arurtem Aonglenden nung agizüka Ungma yimden aser nüburtemi kanga meraketa agizükba den apokatsü teperi renemtsü. Aonglenden nungi senden agiba tesem Rural Assembly Hall tashi yimdong süa jajayonga or Ungma nung iba senden akaba aser Naga nunger lungjemba tamaitü FNR Convenor, Rev. Dr. Wati Aieri lungzüng ka azüngtsür senden tenzüka liasü.

PHC Chessore nung Satellite OST Centre semzük

Dimapur, Luroi/August 23 (TYO): Shamator District kübok PHC Chessore Town nung Satellite OST Centre semzükba sentong ka August 23, 2025 nü Chessore town nung Office of CMO, Tuensang kübok agia liasü.

Iba centre ya K. Tsusola, Associate Pastor Women, Chessore Town Baptist Church ajanga semzüksü.

Dr. Kumrimong Yimchunger

MO, Chessore PHC ajanga iba sentong nung jembidang, opium addiction ya tekolok shisatsü aser mulungsentsü nung addiction ka lir, ta ashi aser nüburtem dang teyari nüngdaka aliba opium achirtem den yariteptsü aser parnok agizüktsüsa tensa tajungba yanglutsü ayongzüka liasü.

Psychiatrist and Nodal Officer (OST), DH Tuensang, Dr. Senilo Magh-ia sentong nung tayongzükba o jembia liasü.

Phesama anasa NH-2 shilem kar lapokogo

Kohima, Luroi/August 23 (TYO): Deputy Commissioner, B. Henok Buchem aser Superintendent of Police, Krodi Rhetso den NHIDCL ketdangsür aser Phesama Council nungi lenirtemi August 23, 2025 nü Phesama anasa NH-2 nung alinen agi kongshia aliba tesem semdanga liasü.

Tawa tzünglu aruba mapang

shizüka aoba lenmang shilem kar yanglushiogo ta Deputy Commissioner ajanga metetdaksü.

Hombarnü, August 25, 2025 nungi college bus service tenzüksü ta pai ashi. Ajisüaka water tankers, paramilitary convoys aser commercial passenger vehicles tem sangdong ka magütsü tashi iba lenmang nung mesenzüi atatsü.

Ungmayimtak Forum for Naga Reconciliation senden aka



Forum for Naga Reconciliation senden Ungma yimtak akaba sentong nung adener NNPGs, Tribal Hohos aser FNR pur külemi tangokba (Achiji) aser Nüngshi Lung ka azüngba noksa nung angur (Abelen).

Mokokchung, Luroi/August 23(TYO): Tanu Ao Senden-i ayongzüka Ungma Kosasanger Puso Menden achayang kübok Forum for Naga Reconciliation senden Rural Assembly Hall Ungma nung kaogo.

Forum for Naga Reconciliation-i tan agi senden 15 ben buba ayonga akar aser tan Ungma senden nungya NNPG’s telok 16 aser Tribal Hohos 34 aruagi aden aser iba ya FNR-i ayongba senden nung adenba timtiba lir.

Tanü iba sentong nung Ao Senden Tir Wb.Marsanen Imsong-i jembidang Forum for Naga Reconciliation-i Naga nunger tanagetba kati aruagi ka küma longjema alitsü asoshi timtem khuret aika bena küm 18 tashi inyaka aruba asoshi FNR dang tepelaba metetdakja ashi.

Naga nunger tangatettep kati aruagi takok ngutettsü asoshi jembitepba aser temzüng ka agi masü saka temelungjang

taroktiba agi agizükteptsüla, Naga nunger taküm aika tenlaogo, Naga nungeri mapang talangka nüktzü yima sarasadema arur,anungji asenoki teraksa alibaji yanglutetdi arungta Ao Senden Tir-isa ayongzüka jembi.

Ao Senden Tir-isa Naga Political Groups-i ochiba nung kati ka nem tatok agütsüteper longjemra yangji nüburtemi tangatetba agi ajemalua Naga nübur asoshi noktaksü mulunga lirta ashi.

Sentong nungsa Wb.Imtitongba Jamir Tatar,Tambuti Ungma Kosasanger Puso Menden-i mapang tatsüka agia jembidang tarur ajak pela agizük aser Forum for Naga Reconciliation (FNR)-i 2008 küm nungi Naga nunger ken o asoshi telok balala ajak tsüngda ka küma longjemtsü asoshi nentaka inyakba asoshi FNR nem tenünmgsang agüja ashi.

Naga nungeri pei taso lima asoshi timtem, takoksa aser

lendong aika ajuruogo, Naga nunger longjemdi, arung asenok tasü aitiba aser inyaktetba kisüng jagi kecha balaka masütsü saka asenok longjemba agi asenoki Naga nunger asoshi kechi inyaksü ta shisa ka-a inyaksü nungtakerta Imtitongba-isa ayongzüka jembi.

Iba sentong tenzüka Tsüngrem nungi temoatsü jazüka Executive Secretary ABAM Rev.Temsü Jamir-i sarasadem aser Rev.Dr.Wati Aier Convenor, Forum for Naga Reconciliation aser Dr.Visier Sanyü Member, Forum for Naga Reconciliation tenatia shilem agia jembiba den ano sentep tembanga Ungma Baptist Arogo Asso.Pastor Women Rev.Talijungla Longkumer ajanga tatem sarasadem agia tembang aser Rev.Dr. Ellen Konyak Jamir Member, Forum for Naga Reconciliation lenisüba nung sentong kanga dang tobur junga agia liasü.

Nagaland Angh inyaksü alisang Ajay Kumar Bhalla aruogo



Nagaland Angh inyaksü shima alisang Ajay Kumar Bhalla Honibarnü Dimapur airport tonga arur Rashtriya Salute agüja agizükba noksa nung angur.

Dimapur, Luroi/August 23 (TYO): Nagaland Angh inyaksü shima alisang Ajay Kumar Bhalla Honibarnü Dimapur airport tonga arua liasü.

Pa ya Nagaland Chief Minister, Dr. Neiphiu Rio aser par cabinet nungi Metsubo Jamir, Minister, RD, SIRD; Zhaleo Rio, Advisor, Urban Development & Municipal Affairs; H. Tovihoto Ayemi, Advisor, Tribal Affairs & Election;

K. Tokugha Sukhalu, Advisor, Food & Civil Supplies, Legal Metrology; Kazheto Kinimi, Advisor, Animal Husbandry & Veterinary Services; Imkongmar, Advisor, Minority Affairs, Sericulture nunger temi agizüka liasü.

Sorkar ketdangsüra Chief Secretary, Sentiyanger Imchen, IAS; Director of Police, Rupin Sharma, IPS; Home

Commissioner, Abhijit Sinha, IAS; Commissioner Secretary Raj Bhavan, K. Thavaseelan , IAS; Commissioner of Police, Dimapur, Aotula Imchen, IPS aser DC, Chümoukedima, Polan John, NCS nungertem Angh agizüktsü asoshi Dimapur airport nung liasü.

Angh tonga aruba sülen 15th Mahila NAP (IR) ajanga Rashtriya Salute (Guard of Honour) agüja agizük.

Nagaland Police Service officer tem training tenzükogo



Dimapur, Luroi/August 23 (TYO): Nagaland Police Service (P) Officers trok atema Basic Office Procedures dak sendakba nung anogo pongu atema training ka Administrative Training Institute (ATI) Kohima nung August 22 nü tenzükogo, koba August 26 nü tembangtsü.

NPS (P) trainees tem nem parnok mapa takok ngua inyaksü atema tenüngdakba shisatsü aser tasatem angazükdaktsütsü nükjidong nung iba training ayongzükogo. Training onüktem rongnung File Management, Noting & Drafting, National Pension System, Nagaland Government Servants' Conduct Rules 1968,

Pay fixation amala densema lir. Training course ya Dr. S. Rongsen Longkumer, Joint Director, ATI-i achaayanga ayongzük aser training session tem ya Nagaland sorkar kübok department balala nungi tajangshiba balala bena aliba shisalen sayurtemi agitsü.

Mezüngbuba anogo training lapokba sentong nung V Shashank Shekhar, IAS, Director General, ATI-i trainee NPS (P) Officer tem den sensak asem aser metetpelaba sentong ka agia liasü.

Pai, bendanga agüja meranga inyakba sobaliba tajung ka Nagaland police-i beshia arudar ta metetdaktsü. Parnoki state nung dang masü

saka tanga state temi yokba mapang pei mapa kanga junga inyaka arudar, ta ashi. Paisa, lanurtem temsepba mozü achiba nungi kümzüka ayutsü ayongzüka liasü.

Maneni Shekhar-i, ken o kar bentetba mapang temzüng özüng benoka inyakba dang masü saka tangazükba den agütsütsü officer trainees tem ajungshi. Pai parnok dang bushisündang maparen balala atema latest scientific shisatsü aser technology tem angazüka anidaktsü ayongzüka liasü.

Sensaksem sentong nung N. Moa Longkumer, Joint Director ATI aser Lithrila Sangtam, Under Secretary, P&AR department nata densema liasü.

INTACH-i ayongzüka Quiz tetoktepba agi

Dimapur, Luroi/August 23 (TYO): Indian National Trust for Art & Cultural Heritage (INTACH) Nagaland Chapter-i ayongzüka August 22 nü Dimapur Lotha Hoho Ki, DC Court Junction nung Class 7 nungi 10 nung zünga aliba kaketshirtem atema National Heritage Quiz Competition ka ayongzüka agiogo.

Ajak senteper iba tetoktepba nung team 31 nung kaketshir 62-i shilem agia liasü. Tetoktepba nung Hollotoli School, Delhi Public School, El-

Shaddai Academy, St. Mary's Higher Secondary School, Ram Janki Higher Secondary School, aser Bethesda Higher Secondary School nungi kaketshirtemi shilem agiogo.

Preliminary round sülen team pezü Oral Round-i ia liasü. Iba round sülen final asaya koba Hollotoli School nungi Class 10 nung azünger Akangjungshi A. Jamir aser Daulen M. Phom nati koka liasü. Tena taruba Regional Round nung Nagaland tenüng nungi asayatsü aser takok

ngutetra New Delhi nung National level tetoktepba nung shilem agitsü maongka angutsü.

INTACH Nagaland Chapter-i iba tetoktepba nung shilem agiba school ajak dang parnok teyari, parnoki teka amteper inyakba aser yakyaka shilem agiba atema kanga pelaba lemsatepogo, koba ajanga sentong takok ngudaktsüogo, ta INTACH Nagaland Chapter State Convener Sentila T. Yanger-i sangdong ka ajanga metetdaktsü.

52buba ARESA anogomung mungogo



Dimapur, Luroi/August 23 (TYO): 52buba Assam Rifles Ex-Servicemen Association (ARESA) anogomung August 23 nü Kenguruse Auditorium, Kohima nung mungogo.

Sentong nung Kohima kübok tesem balala nungi Ex-servicemen, Veer Naris aser parnok kibongtemi shilem agia liasü.

Ex-servicemen aser Veer Naris temi linük asoshi

bendanga agüja inyakba tushitsü atema iba sentong ayongzüka amung, shirnoki Assam Rifles aser linük nem teyari tulu agütsüogo.

ARESA, Kohima ya 1973 küm August 24 nü tenzükba sülen küm shia iba anogomung kanga nema danga aser tenüngsang agüja munga arudar. Sentong nung gallantry awardees aser Veer Naris tem nem parnok tasü aitba aser

mapa tajung asoshi tetushi agüja liasü.

Kasa sentong nung Assam Rifles-i nüngdaka aliba veteran tem nem wheelchair ka aser walking sticks trok agüja liasü.

Veterans tem mapa tajung bilemteta amungba ajanga Assam Rifles Ex-Servicemen Association-i maneni lanurtem mulung nung khuret abentsü atema tangatetba ka agütsür.

NVBDCP-i Kiphire district nung monitoring & supervision agi

Kiphire, Luroi/August 23 (TYO): State National Vector Borne Disease Control Programme (NVBDCP)-i Kiphire district kübok Longmatra H &WC, Phuvkiu H &WC, Pungro village SC, Pungro CHC, Sitimi PHC, Seyochung village H &WC, Seyochung CHC, District Hospital Laboratory & District Vector Borne Office nung August 19 nungi 21 tashi monitoring aser supervision inyakyimtem ayongzüka agiogo.

Iba inyakyim ya Dr. Tinurenla Deputy Director NVBDCP lenisüba nung Kikolul Khieya Asst Director UVBDS, Imsubenla state PH & training Consultant, Atuono Rupreo Entomology consultant aser Lab technician ka aser Insect Collectors anati achaayanga agia liasü.

Kasa mapang nung lepa reprangshiba senden ka Deputy Director Dr. Anichari-i achaayanga CMO office nung amen, kong field semdangba mapang tengutetba balala aser inyakyimrenloka aobatem indang sensaksema liasü. Senden nungsa Surveillance workers & Malaria Technical Supervisor inyakyim asadang aser NVBDCP program inyakyim ajunga lepareprangshia liasü.

Health Unit tem ajak nung

mapang ajak nung ramen mozütem agütsütsü atema staff tem dang kanga kümdang aser nendak nendaka inyaksü aser pei tata tesem metoktsüi inyaksü ajungshia liasü. Senden nungsa international arrtsü nung migrant tem ajak dak fever aser ramen tashidak tendangtsü nenshia metetdaktsü.

Maneni nüburtem dang hopta ka nung dry day ka amungtsü ayongzü, aser iba anogo ki temeket nung naro pot tamendakdak, bongdang tazüng, cooler, tyre, bucket amala nung atsünga aliba tzütem intoka amungtsü, kechiyong tzü temerek banga alidak dengue merilai entsü koa rizüker. Entsü ya hopta ka tsünga rizüker.

Kasa mapang nung Entomological Team-i District nung Vector Surveillance ayongzüka agi, kong Malaria, Dengue & Japanese Encephalitis atema Vector density tem nguteta liasü. Dengue atema Sentinel Surveillance site hospital amenokogo, kong Dengue tashidak tendangtettsü.

Inyakyim balala benoka inyakba mapang ngutetbatem CMO Kiphire nem metetdaktsüogo aser administration aser department na longjemer jenjang agitsü atema sensaksema liasü.

Dimapur Government College nung 58buba Freshers' Meet mungogo

Dimapur, Luroi/August 23 (TYO): Dimapur Government College nung August 22 nü 58buba Freshers' Meet mungogo.

Ajaki kanga yonga aliba iba sentong ya Dimapur Government College Students' Council (DGCSC)-i ayongzüka agi, koba formal aser informal ta session ana küma lemsar agia liasü. Formal session ya Arina Yaden aser Kehika Yeptho na lenisüba nung agia liasü.

Sentong nung o jembiba mapang Dimapur Government College Principal, Dr. T. Tiakaba Jamir-i college terenlok aser talisa science stream tenzükba aser undergraduate aser postgraduate (MA in Education) naprongla nung taoba university tatidang nung kaketshirtemi takok tajung anguba indang lemsatepa liasü. DGC nungi MA Education nung Mutsoi Kham-i topper liasü aser la kuli kaket tajung den senpet agi tushio. Paisa, fresher tem takok nguyonga zünga aotsü imlaja ataba lemsatepa liasü.

Sentong nung Minister of Higher Education and Tourism, Nagaland Temjen Imna Along, faculty; staff aser college kaketshirtem; St. John College, Immanuel College, MGM College, Salt Christian College,

Patkai Christian College, Eastern Christian College, Pranab College, Cornerstone College, SD Jain College, Sakus Mission College, Public College aser Livingstone College nungi tejaokertemi shilem agia liasü.

Sentong nungsa fresher tem tenüng nung I. Joilem Konyak-i o jembia.

Kasa mapang nung alakteta jaokeri Nagaland tashi taitba kümdaktsütsü atema telongjem aser teka amteper inyaksü ayongzüka liasü. Paisa, kin o kin tsünga tebandang malitsü ayongzükba den takok angutsü atema shortcut kecha mali ta shia parnok dang meranga inyaksü ajungshia liasü. Minister-i, kaketshirtem dang renema alitsü, ajemalutsü aser kati ka nongita yariteptsü ajung shia liasü. Kaketshirtemi ken atenba angaba sülen taruba küm tetenzüklen inter-college music tetoktepba ka ayongzüktsü pai shidangogo. Maneni pai taruba kümtem tsünga classroom ajak nung AC inoktsütsü tenangzükba agüja liasü.

Formal session ya Traditional Round ka sülen tembanga liasü, kong Mr & Miss Freshers atema tetokteper parnok 16-i parnok indang sobaliba sobutsü aser sobaliba balala sayua liasü.

ARATIYA ANTARIKSH STATION



August 23, 2025 nü New Delhi nung National Space Day anogomong nung 'Bharatiya Antriksh Station (BAS)' sayaba sentong nung Group Captain Shubhanshu Shukla, Group Captain Prasanth Balakrishnan Nair aser Group Captain Ajith Krishnan nunger tangokba noksa nung angur.

Abbottabad nung shiba anguar US-i mamatoktsüla: S Jaishankar

New Delhi, Luroi/August 23 (Agencies): US aser Pakistan na tsünga tesendaktep aija Honibarnü External Affairs Minister, Dr S. Jaishankar-i, Abbottabad nung shiba anguar asenoki mamatoktsüla, ta ashi.

Kiralongrar tetsüti Osama Bin Laden Pakistan kübok Abbottabad nung lia US sepaitemi khasetba dak sendakba nung Jaishankar-i iba o ya jembi.

The Economic Times World Leaders Forum 2025 nung jembidang, India aser Pakistan na tsünga tiyongtsüi ia jembiba dak sendakba nung Dr Jaishankar-i, "Tasembuba telok ka tiyongtsüi aita jembiba dak sendakba nung, 1970s nungi tenzüka joko küm 50 dak tali iba linüki Pakistan den tesendaktep ayuba dak sendakba nung tangar tiyongtsüi maitdaksür," ta metetdaksü.

India aser US tsünga shishilembaba dak sendakba tezüngzüktep ka agitsü atema jembiba dak sendakba nung Jaishankar-i, "Tang tashi iba atemaji jembia arudar. Sorkar ka ama onoki ozü aluyimertem aser tilateri producers atema inyaksü. Iba nungjibo onoki atsü-anem kecha makatsü," ta metetdaksü.

India-Russia tesendaktep dak sendakba nung Jaishankar-i, "Tir Vladimir Putin den senden amentsü sentong lir. Tesendaktepji yamaji ainer. Linük ana tsünga shishilembaba jenjang tera inogo, aser maneni indaktsüner," ta metetdaksü.

Tawa Alaska nung US Tir Donald Trump aser Russia Tir Putin na senden amenba dak sendakba nung Jaishankar-i, "Tir Putin Alaska nungi aruogo aser pai kü den pa tebilemba

lemsatepogo. Iba rara (Ukraine) tekaraba nung anendaktsüner, ta onoki mezünyongi jembia arudar," ta metetdaksü.

US aser Pakistan na tsünga tesendaktep aija Jaishankar-i, "Parnok tsünga puti otsü lir, aser parnoki parnok puti otsü amadoker. Abbottabad (Pakistan)-i aoba sepaitemji panok (US) lir aser yangji shiba (Bin Laden) liasü?" ta asüngdang.

Operation Sindoor aser Trump-i pai tiyongtsüi ia jembiba ajanga Pakistan aser India na tsünga rara anen, ta jembiba dak sendakba nung Jaishankar-i, "US-i aiben phone asü aser tanga linüktemia phone süogo. Ibaji miim mapa ka masü. Tiyongtsü ia inyak mesüra India aser Pakistan na tiyongtsüi ia jembi, ta asüabajibo balaka," ta metetdaksü.

2014 küm nungi tenzüka opposition nungi minister 12 bo puogo

New Delhi, August 23 (Agencies): Tan hopta tetenzüklen Union Home Minister Amit Shah-i Parliament nung bill asem benoka agizükogo, aser item bill ji ozüng alema inyaker Ato kilonser, Union Ministers aser state minister tem menden nungi anentsütsü atema lir.

Item bill asem anema Opposition züngsemtemibo longkak aita bill asem kaket shisaa liasü.

Ozüng alema inyakba ken otem nung tai tonglokja jail nung puokra mesüra anogo 30 dak tali pua yura minister tem, chief minister tem mesüra Ato kilonsera menden nungi anentsütsü.

Open-Source Intelligence (OSINT) team-i ashiba agi, 2014

küm May ita nung Centre nung BJP sorkar aruba sülen opposition nungi minister teinyakdak 12 bo puogo, aser parnok teimbaka Central Bureau of Investigation (CBI) aser Enforcement Directorate (ED)-i apu. Agency ana ya Centre sorkar kübok lir.

Taoba mapang Delhi Chief Minister Arvind Kejriwal densema minister 8 bo anogo 30 dak tali jail nung puokogo. Tawa Parliament nung agizükba bill asem ya tamalen agizük asübo parnok ajak minister menden nungi anentsür lila.

Minister tenetbo Prevention of Money Laundering Act (PMLA) kübok apuba liasü.

Minister 12 ji kar senotsü nung ochimashiba, ashiochtsüba, Delhi nung excise policy, Saradha chit

fund ochimashi aser West Bengal nung tesayur shimba inyakyim nung ochimashiba ken otem nung apuba liasü.

Minister teimba apubaji (5) West Bengal Chief Minister Mamata Banerjee'er party Trinamool Congress (TMC) nungi lir, Aam Aadmi Party (AAP) nungi minister pezü, Dravida Munnetra Kazhagam (DMK) nungi ka aser Nationalist Congress Party (NCP) nungia ka apu.

Kasa mapang nungji BJP nungi mesüra NDA teloktep nungi minister tembo ka danga mapu. Arms Act ken o nung Uttar Pradesh nung minister Rakesh Sachan küm ka jail nung puoktsü obendang agüja liasü saka bail nung chiok aser maneni minister inyaker.



Tawa Ahmedabad nung class 10 nung azünger ka kotari agi tsüngseta südaktsüba anema August 23, 2025 nü Seventh Day Adventist School nung azünger tsüraburtemi longkak aitba noksa nung angur.

FORM NO. 14

[See Regulation 33 (2)]

OFFICE OF THE RECOVERY OFFICER - /III
DEBTS RECOVERY TRIBUNAL GUWAHATI

Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati-781007 (Assam)

DEMAND NOTICE

RECOVERY OF DEBTS & BANKRUPTCY ACT, 1993 KÜBOK SECTION 25 NUNGI SECTION 28
TASHI ASER THE INCOME TAX ACT, 1961 SECOND SCHEDULE KÜBOK RULE 2 NUNG
AJEMDAKER NOTICE AGÜTSÜR

RC/2834/2018

STATE BANK OF INDIA

- VERSUS -

MUDOVOYI NYEKHA NYEKHA

To,

(CD 1) MUDOVOYI NYEKHA NYEKHA, SON OF SRI VELHUNYI NYEKHA, CHESEZU VILLAGE,
P.O AND P.S - CHOZUBA, TOWN NAGALAND, Phek, NAGALAND- 797104

OAI/476/2017 nung DEBTS RECOVERY TRIBUNAL GUWAHATI nung Presiding Officer tetuyuba nung ajemdaker Recovery Certificate agütsüba ama Rs. 19,74,839.80 (Rupees Nineteen Lakhs Seventy Four Thousands Eight Hundred Thirty Nine and Paise Eighty only) den pendtellite aser 07.11.2015 anogo nungi sentsüh mouma tashi future interest @ 13.50% nung aser costs Rs. 22,000/- (Twenty Two Thousand Only) na anema (Jointly and severally/Fully/Limited) lir.

1. Recovery Certificate nung aliba sentsüh:	Rs. 19,74,839.80
2. 07.11.2015 nungi 09.07.2018 tashi nung interests @ 13.50%	Rs. 1,84,609.73
3. Costs	Rs. 22,000.00
Total:-	Rs. 21,81,449.53

2. Iba notice agütsüba sülen anogo 15 tsünga tekalen shia aliba sen ajak agüjang ta nü dang tuyur, mesüra Recovery of Debts Due to Banks and Financial Institutions Act, 1993 aser Rules nung ajemdaker sentsüh alangzüksü atema inyaksü.

3. Nü dang taruba ken o angadangba anogo madongdangsa affidavit nung nü kiojen tejangja sangdongang ta tuyur.

4. Nü dang maneni ken o angadangsü atema 30.10.2025 anogo nung anepdang 10:30 ako tashi nung tsünglanglen sign süa alir matsüngdangi arung ta tuyur.

5. Tekalen shia aliba senotsü dak alia nai item ya-a agütsüsüsa akümtsü :

(a) Certificate/execution proceedings indang iba notice agütsüba mapang nungi tenzüka interests.

(b) Iba notice aser warrant agütsüdang teindokba aser sentsüh alangzüksü atema inyaksangdshidang indokba ajak agütsüsü.

Tsünglanglen kü meyongnem den iba Tribunal seal iba anogo nung agütsür: 11.08.2025

Recovery Officer
Debts Recovery Tribunal, Guwahati



Ranchi, August 23, 2025: Ozüng alema inyaker, Mayank Singh (Sunil Meena) Azerbaijan linük nungi Ranchi nung aliba Birsu Muda Airport tonga anir aruba sülen Jharkhand Anti-Terrorist Squad (ATS) sepaitemi anir aoba noksa nung angur.

FORM NO. 14

[See Regulation 33 (2)]

OFFICE OF THE RECOVERY OFFICER - /III
DEBTS RECOVERY TRIBUNAL GUWAHATI

Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati-781007 (Assam)

DEMAND NOTICE

RECOVERY OF DEBTS & BANKRUPTCY ACT, 1993 KÜBOK SECTION 25 NUNGI SECTION 28
TASHI ASER THE INCOME TAX ACT, 1961 SECOND SCHEDULE KÜBOK RULE 2 NUNG
AJEMDAKER NOTICE AGÜTSÜR

RC/66/2025

STATE BANK OF INDIA

- Versus -

MS AYEMI ENTERPRISE AYE

To,

(CD 1) Ms Ayemi Enterprise, Proprietor of Late Ihoshe Aye, Represented By Mr Inaputo Ayemi, H No. 161, Nihokhu Villagew Nihokhu, Niuland, Nagaland - 797109
(CD2) Mr Inaputo Ayemi, S/o Late Ihoshe Aye, Proprietor Of Ms Ayemi Enterprise, H No. 161, Nihokhu Villagew Nihokhu, Niuland, Nagaland - 797109
(CD3) Mrs Tovini, W/O Late Ihoshe Aye, H No. 161, Nihokhu Villagew Nihokhu, Niuland, Nagaland - 797109

OAI/231/2024 nung DEBTS RECOVERY TRIBUNAL GUWAHATI nung Presiding Officer-i tuyuba nung ajemdaker Recovery Certificate ama Rs. 95,13,459.37 (Rupees Ninety Five Lakhs Thirteen Thousands Four Hundred Fifty Nine and Paise Thirty Seven only) den pendtellite aser 15.05.2024 anogo nungi sentsüh mouma tashi future interest @ 12.65% Compound Interest Monthly aser costs Rs. 98,005/- (Rupees Ninety Eight Thousands Five only) na anema (Jointly and severally/ Fully/Limited) lir.

1. Recovery Certificate nung aliba sentsüh:	Rs. 95,13,459.37
2. 15.05.2024 nungi 24.06.2025 tashi nung interests @ 12.65%	Rs. 14,29,571.83
3. Costs	Rs. 3,54,706.00
Total :-	Rs.1,12,97,737.20

2. Iba notice agütsüba sülen anogo 15 tsünga tekalen shia aliba sen ajak agüjang ta nü dang tuyur, mesüra Recovery of Debts Due to Banks and Financial Institutions Act, 1993 aser Rules nung ajemdaker sentsüh alangzüksü atema inyaksü.

3. Nü dang taruba ken o angadangba anogo madongdangsa affidavit nung nü kiojen tejangja sangdongang ta tuyur.

4. Nü dang maneni ken o angadangsü atema 24.07.2025 anogo nung anepdang 10:30 ako tashi nung tsünglanglen sign süa alir matsüngdangi arung ta tuyur.

5. Tekalen shia aliba senotsü dak alia nai item ya-a agütsüsüsa akümtsü :

(a) Certificate/execution proceedings indang iba notice agütsüba mapang nungi tenzüka interests.

(b) Iba notice aser warrant agütsüdang teindokba aser sentsüh alangzüksü atema inyaksangdshidang indokba ajak agütsüsü.

Tsünglanglen kü meyongnem den iba Tribunal seal iba anogo nung agütsür: 24.06.2025

Recovery Officer
Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR SUNDAY, AUGUST (LUROI) 24, 2025

Na ya tesangwa !

Laishibai ashir, asenok ajak ya tesangwa lir. Aji oda, tanü nü dang kari nü tenüing watsü mesüra wabong Tesangwaba mesüra Tesangwala lir ta ashika asünunga naia koma bilemtsü. Ni jashia dang alir nung kodaser kü tenüing Tesangwa asütsü ta nai bilemtsüa akok. Kü o aser mapa agi shinga mepeladaksütetter nung kodaser kü tenüing Tesangwa asütsü ta nai rataa bilemtsüa akok. Ajisüaka, Mathi 5 : 14 -16 nung ashir, " Nü dak aliba tesangwaji nisungtemi angutsüsa yalokjang, idangji parnoki nai tajung inyakbaji angutsü aser kotak nung aliba tebu sentsüwangshidaktsütsü." Tetezü asenok nisung shia dak tesangwa lir aser asen dak aliba tesangwa jagi amang ajak sangwadakja ayatsüla. Tesangwai inyaksüba mapaji amang sangwadaksütsü asoshi lir. Aji oda, Tsüngremi nü taküm nung iba sangwa jagi sünga lidaktsüner. Iba tesangwa jagi nü dak Tsüngrem tashi alibaji tangar tsüngdang kuli südaktsüner. Iba jagi asen meketa aliba adianutem shirnok mulungjang nung tamang aser shisabolu agi sünga lir, parnok mulungjangji tesangwa agi melentsütsü. Ajisüaka, asenoki asen aliba lima ya temenen agi sünger tammangba- tammangba akümba angur. Iba ama mapang nung asenoki tammang aitsüba kija agibo tesangwa mangutsü. Alima manga akümbaji parnoka parnok shilem inyaker, anungji asenoka asenoki inyaksüba tongtiban mapabaji asenok dak aliba tesangwa tashiji tammang tashi dang nung jagi tuluba asütsüla. Kodang asen meketa tammang agi süngadokdir, tebilemtsüji amangji masü saka mesangwadaksütetbaji asütsü. Yisui asenok ajak ya alima sangwadaktsürtem südaktsüner. Alima nung Tsüngrem temeim mangashidangba purtem million aika lir, item dangji asenok dak aliba tesangwaji bener oa Tsüngrem temeim metetdaksütsüla. Kodang, Yisu alimai aru, alima nung tammang jena oa adok. Alima tammangi pa tesangwaji metizüktet. Pa aolen ajaklen Tsüngrem temeimi alima meimchirtem kümzükbaba osang tajung sangdong, meimchirtem temulung meyip, shirangertem aneptsü, temenen purtem nem taidok agütsü aser anemsüba mapatem jakdaka arütsü. Alima temenen tammang tia nung aliba mapang kodang Tsüngremi iba limaji sangwadaktsütsü asoshi Pa chir Yisu Khrista alimai yok, iba jagi alima sangwadaktsü. Ibayongji, asenok ano tanaben Tsüngrem chir aküm, anungji joko asenok tammang chirtem masü tesangwa chirtem lir ta Laishibaisa ashir. Tesangwa chirtem tetezü asenok dak tesangwa lir aser iba tesangwa jagi amang tia nung aliba taküm aser kibong sangwadakja inyaksüla. Asenok dak aliba tesangwaji tangari angutsüsa asenok taküm aser kibong alitsü tim. Nü dak aliba tesangwaji tsükloker oa tangar tsüngdang sayuang ta Laishibai mashir, saka tangar nem ngudakjang ta ashir. Tetezü, asenoki mesayutsü saka tangari asen dak tajung alibaji repringtetsüla. Aji oda, asenok taküm aser kibong nung tesangwa alibaji asen meketa alirtemia angutsüsa asenok Tsüngrem den teti alitsüba kanga tongtiban asütsü. Ken agia ashir, talang nung alirtemia nü dak aliba tesangwaji angutsüsa, na alidak sangwajang. Asenok ya tesangwa, anungji taküm piyong asenok asoshi amang ya tsükchir asütsü.

OLEMSABANG

OSHI YA KIN KA AYAK LIR

~ L. Kika Pongener.

Nisung ka tetsüpok nungi sozükli oshi ya jembitsü tenzüker. Kinu tanur ka sozükli tamasa ola adoka oshi jembitsü tenzükbaji ayadang, tzüradang, tepok onudang aser tzü indoknudang ajeptsü. Kinu tanur ka ajepba olaji nisung ka taküm nung mezüngbuba oshi lir. Iba sulen kodang chiyungtsü achitsü tenzükdir, tetsüi chi chiyungang ta ashidang 'aam' ta aser tzü jemang ta ashidang 'koko' ta kinu oshi agi jembitsü tenzüker. Iba sulen kodang nokdakteta tera jaja-a oteta kümdir 'jaja-jaja' ta....aser alangtsüsa denjira 'kong' ta....ano anak-awa kar shia-arua chira 'chi' ta; aser yiruyipongtsüsa denjira 'ayako' ta....tanur oshi agi jembir. Ano iba sulen kodang o tera repteta jembitsü koka kümdir oja, oba, otsü, obou, odi, oya, ta ajatsü tenzüka sayur. Oshi ajanga nisung o nisung na tsüngda metetteper, angatetteper aser sendaktepdaktsür. Oshi denji jaya-jako aser nungja-koja dena lir. Oshi jagi nisung ka pa/la kechi kin'ar aji jangjatsür. Oshi ka makara kin ka ta ajatsü makok. Oshi ya kin ka ayak (Identity) lir. Oshi ya kin ka sobaliba tamentakdak lir.

Asen Naga nunger tangar kinbo oshi ka dang, saka asen Aorbo tia kaa oshi tongben ana 'Jungli' aser 'Mongsen' oshi akaba ya maongka tulu ta bilemdi. Chungliyiimti lima alidang nungi otsüla oboula nunger kenten-menu ya kanga tongtipang liasü. Parnok ken ajanga dang kati ka den metettepa, sentaktepa aser langzütepa lia aru. Nokinketertemi mangko lepa bener arudang aser taka-taitertemi kika-suchidang; konang-naroküm agüja tushia ken tajung mejema tenlokja naklolepa lia aru. Otsüla oboula nungeri ken mejema atendang Mongsen o agi teimba mejema aten, kechiyong Jungli o agi atenba dang nungi; Mongsen o agi atenba kensuji tanganutsü taketba aser tarokba. Ajisuaka, jembishinu, kakat ken o, otsü-olem aser zülubanglo....itemjibo jungli o agi jembia aser zülua aru; kechiyong kati ka den jembitsü aser angatetteptsü atema Jungli o-ji temetongba aser temelaba. Yongji, asen tsürabur mezüngburtemi ken kakat aser laishiba ya-a jungli o nung zülü sudi ta rajemer. Ano tang Ao Senden Literature Board (ASLB)-ia Arok osep aser Ao zülumen ajak jungli o nung zülua adoka lir; aser School aser College ajak nung iba kakat ken o zülubanglo-ji 'Course' agia odar.

Anungji lanurtemi Jungli oshi aser Mongsen oshi anaprongla ya mesamadaktsüi wazüka ayutsüla. Kanga tesasatsüka, otsüla-oboula nunger asen oshi aser otsü-olem zülü-banglo nung maka, tebang o agi dang belentepa jembia aru. Otsü agi ashiba agi asen oshiji shiküp nung zülü aser aji Azü (Dog)-i chiadok. Anungji asen oshi jembitsüba dak alaka, zülutsü makai lia, kanga tia kaa asen Ao limai American missionary Dr. Clark nunger arur; Yisu yimsu osangtajung sayuba den; ano kakat shisatsü 'Shisaliok' dena tenzüka tera yanga yutsü. Ano kanga-sa tia taka kaji...Asenok zülüjang (Albapet) makai aliba; Dr. Clark-i English albapet amshia 'Ao Dictionary' kakat tilaka zülua nukmen tenzüka yutsü. Iba 'Ao Dictionary' kakat tilakaji asen Ao kin asoshi senti rongsen senmang lir. Iba denji metenloka asen tsürabur mezüngbur shirnoki; laishiba aser ken kakat asen Ao oshi agi meyipzüker adoka tera yanga yutsüogo; asenoki parnok nem tenungsang agütsüdi; kechiyong ibaji asen Ao oshi renloktsü mezüngbuba tera ayangdak kimong (Foundation) liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Galilee tzüyim nung küm 2,000 tejaklen aliba rong kangutet



Galilee tzüyim telung nung anguba rong noksa nung angur

August 23, 2025: Galilee tzüyim nung küm 2,000 tejaklen süng agi yanglua amshiba rong ka ngutetogo, aser iba rong ya Laishiba nung Yisu Khristai sayatenya inyakba ka den sendaktepa alitsüa akok, ta bilemer.

"Jesus Boat," ta tenüng jalokja aliba rong ya cedar süng agi yangluba lir aser iba rong nungji nisung 12 shi mentettsü. Yisu nütsüngtem rong ka nung lia Yisu-i tzü-ma nung jajaa sayuba tatalokba tu iba rong nung asütsü, ta bilemer.

Laishiba archaeology nung mongin, Danny Herman-i, "Iba ya archaeology ajanga bushitetba masü; iba ya tzüyim nung Yisu indang nüngtugu otsü den sendaktepa lir," ta ashi.

"Yisui tzü nung jajaba dak sendakba rong tu ibai lir ta ni kuli mesayutettsü, ajisüaka Laishiba otsü nung tatalokba rong-a yamai kasa liasü," ta pai ashi.

"Rong anasaji totzü milen-a liasü, anungji iba rongji aonung amshi südi ta bilemer, aser ibaji Yisui tzüyim nung yipru süngjemdaksüba otsü amai lir," ta pai ashi.

Iba rong ya 1986 küm Galilee tzüyim nung tzü kanga akongba mapang nung adianu ana- Moshe aser Yuval Lufan nati rongji Magdala anasa nguteta liasü. Iba rongji tzüyim telung nung aliba jana nung küm 2,000 shi liasü.

Archaeologist temi rongji shizüka aoba nungi küzmüksü atema fiberglass nung wazüka ayu, aser iba inyakyim atemaji küm 16 tashi agia liasü.

Archaeologist temi Yisui tzü agi yi kümdaktsüba tesem ngutet

August 23, 2025: Archaeologist temi Laishiba otsü nung shia aliba mesüka lung agi yangluba mori chipo tejaksa aika ngutetogo, aser parnoki iba tesemji Cana yimdak Yisui kiyimba benjung ka nung tzü agi yi kümdaktsüba tesem lir ta amanger.

2004 küm Israel nunger archaeologist, Yardena Alexander-i mori chipo tejaksatemji nguteta liasü, aser parnoki bushisüngdangba ajanga iba tesemji Yisu Khristai mezüng sayatenya inyakba tesem asütsü ta bushitetogo.

Yardena-i, lai ngutetba mori chipotemji Laishiba otsü nung Yisui amshiba mori chipo lir ta bilemer. Laisa, mori chipo ngutetba tesemji akhidang Cana yim aliba tesem asütsü ta bilemer.

Ajisüaka Laishiba shisashirtemibo ibaji kuli tejangja asü masüar ashitsü kanga tasak, kechiyong tang tashi mongintemi akhidang Cana yimji kong aliar tejangja memeteter, ta ashir.

Cana yimdak Yisui tzü agi yi kümdaktsüba ya Pai inyakba mezüngbuba sayatenya liasü aser pa ministry tenzüka tongtibang mapang ka nung liasü, ibayongji Khristan Laishirtem aikati iba otsü ya kanga tongtibang süa züngshir.

Lung agi yangluba mori chipo tejaksaji tang aliba Cana nung ali tua bushisüngdangba mapang nung tuteta liasü. Tang aliba Cana ya Capernaum aser Nazareth na tsüngda lir.

Yardena-i, ali chipo tejaksaji Rome putu mapang nung liasü, aser iba mapang nungji Yisu-i Galilee ajanga ainlen jajaa liasü, ta ashi.

Yardena-i, "Archaeologist temi ali tua bushisüngdangba ajanga bushitetba ajakji ajanga Yisu mapang kiyimba benjungji tanü putu nung aliba Cana nung lir ta bushiteter. Onokia iba tesem nungji bushisüngdanga arur," ta metetdaksü.

Archaeologist, Shimon Gibson-i, "Lung agi yangluba ali chipo ngutetba kija jagi iba tesemji akhidang Laishiba nung shia aliba Cana yim lir, ta ashitsü makok," ta metetdaksü.

Yardena-i, iba tesem nung ngutetba ali chipo tejaksaji telongtet nung inch 12 nungi inch 16 tashi asütsüa akok;

ANO GO ABEN TSÜNGREM DEN

TILA TANURTEM KÜ DANGI ARUTSÜ TESONGTEM

"Aser pa nem kongshidaktsütsü asoshi parnoki pa dangi tila-tanurtem anir aru; saka kodang nütsüngtemi aji angu parnoki parnokji arütsü." Luk 18:15

Alima nütsüng yongsük asadangba mapang ajak nung teti tila tanurtem timba asür. Item tila tanurtemji ajaki meimer, parnok angu dang pelar aser nükshia repranger. Saka nisung tain kar dang jembishinü mesüra taküm libaliroba nung tila tanur ama teli ta shira ajibo manganer.

Tanü asenoki asen mapaji reprangdangra tsürabur aikati pei tanur Yisu nem kongshidaktsütsü asoshi pa bushia anir aruba ama Tsüngremer temoatsü asen tanur dak mongdaksütsü tejangraba nung child sentep, sunday school ki kima tashi anir oa yutsür.

Temeim tsüraburtem, child sentep ki, sunday school ki tashi anir aruba nung temulung lema bilemer asü? Tanü lanur aika child, sunday school dak alaka tekülem ki mangu jungnüseta raksaba angutsü. Pei tanur dang tenla ki mesayubaji Yisu nütsüngtemi tila tanurtem songtemba ama asenoki songtemer masü no? Küsa Tsüngrem oi asenok dang ashir, tila tanurtemji pa dangi anir arung. Yangji asenok tain tinyaktsü mapa ka lir aser aji anir aotsüba. Kotakji tila tanur shisatsü temerükpur meyong asünung item tila tanur meyong kotak lima nungji külemi alitsü asoshi Tsüngremi asenok tsüraburtem dang asen chirnur ajak anir iba kotak limaji bushiang ta ashir.

Belfast 'March for Jesus' sentong nung meyrjang aikati shilem agi



August 23, 2025 nikongdang Northern Ireland yimtiba, Belfast nung 'March for Jesus' sentong nung shilem agirtem noksa nung angur

August 23, 2025: Honibarnü Belfast City Council Northern Ireland yimtiba, committee-i, "All Nation Church-i iba sentong agitsü atema aikati 'March for Jesus' sentong nung shilem agia jajaogo.

"March for Jesus" sentong ya Honibar nikongdang 2:00 ako nung Ormeau Embankment nungi tenzüker aser Ravenhill Road ajanga yimtileni aoba sülen Belfast city hall nung sentong ka agia tembanga liasü.

City Hall nung Iba sentong nung Ireland tatembangbuba sentongji kentener, Brian Houston leniba nung agi aser Arogo balala nungi lenirtem aikati o jembia liasü.

Iba sentong All Nation Church-isa kasa ayongzükertemi, iba sentong ya Belfast nung Yisu tenüng ajungkettsütsü atema lir, ta metetdakja liasü.

Belfast City Council committee-i, "All Nation Church-i iba sentong agitsü atema Ormeau Park amshitsü asüngdanga liasü aser iba rally ji city hall tashi oa agiba sülen iba tesem nungjisa sentong tembangtsü," ta metetdakja liasü.

'March for Jesus' ya yimtenren den sendaktepa aliba sentong ka masü saka kibongtemi amongba Khristan tamang benjung ka lir.

Iba sentong nung Ireland nung aliba Arogotem longjemer tekülem sentong agi, yimjung atema sarasadem aser teimla osang sangdongogo.

AO OSHI ANGAZÜKDAK:**TANÜ ANGAZÜKTSÜBA OJANG****Tesünep**

(adj) temulung nung shisabolu mali süngjema litetba (peaceful)

* Yimjung aliyonga temulung nung tesünep malitsüa akok.

Tesüngjem

(adv) ajemajema aliba (calmness)

* Tesüngjem nisungi tangar den putepa liteter.



Tir Yimyim

OLONG PAITEP # 7249

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemasa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7248 TELANGZÜBA**TIPIEN :**

1. Kilir, 5. Lasüng, 7. Samaru,
11. Jaka, 12. Naro, 15. Langzü,
17. Mapang, 18. Arong.

LANGTSÜNGLEN :

2. Lasa, 3. Kar, 4. Ana,
5. Langtsüng, 6. Sujong, 8. Rajem,
9. Arogo, 10. Tanela, 13. Züno,
14. Lao, 16. Ano.

NAI-A YA METETTER MA

France yimtiba Paris nung amenoka aliba Eiffel tower dang ya local temi "La dame de fer" (French agi "Iron Lady") ta ajar. Iba tower ya 1889 World's Fair indang centrepiece ama yanglua liasü. Tower ya meter 330 (1,083 ft) talang koba 81 storey building ka den kasa asütsü. Iba ya Paris nung structure talangtiba lir. Küm shia iba tower semdangertem aika arur aser 2022 küm nisung 5,889,000-i semdanga liasü.

Press Club of India-i Sharma anema benokba FIR agintsü akhang

Guwahati, Luroi/August 23

(Agencies): Press Club of India (PCI)-i Hokolbarnü Assam Police dang osangbener Abhisar Sharma anema benoka aliba FIR agintsü mepeshia metetdaksüba den iba inyakyim ta "press freedom" anema jenjang agiba ka lir ta ashi.

FIR nung Sharma-i, sorkar inyakyim nung minprong adokdaksütsü, kin o kin tsüngda mangatetep adoktsü aser linük integrity anema jembia liasü, ta shia lir.

PCI-isa, FIR ya Bharatiya Nyaya Sanhita kübok Sections 152 (sedition), 196 (promoting enmity and disharmony), aser 197 (imputations against national integration) dak ajemdaker benokogo, ta ashi.

Parnoki tawa The Wire indang Founding Editor Siddharth Varadarajan aser Consulting Editor Karan Thapar na anema Section 152 dak ajemdaker Assam Police-i ken o benok saka Supreme Court-i tena maputsü atema interim protection agütsüba indang metetdaksü.

"Assam police-i tanga osangbener dak sendaka aliba ken o tem dak sendakba nung SC-i tetuyuba agütsüba hau ta mali toktsür aser iba ajanga press freedom mezüngmeshiba sayur," ta PCI-i ashi.

Maneni PCI-i, osangbener tejen aser Editors Guild of India secretary Ruben Banerjee indang YouTube channel ka shibangtsüba atema süoki ia

bilemba lemastepogo.

Odia oshi nung lapokba channel, Mu Ruben Kahuchhi (I am Ruben speaking) koba ajanga social welfare, tetsürtem self-help group aser state o national politics indang jembir, iba channel ya jelia osang magütsü August ita shibangja liasü. YouTube-i ashiba agi, iba channel yagi parnok indang "circumvention policy" nung aibelena liasü.

"Sharma aser Banerjee naprongla indang ken o ya osangbenertem dak rangloker inyakba inyakyim nung shilem ka lir. Assam Police aser YouTube nati iba jenjang agiba ajanga freedom of speech & expression tashi meite kümdaksür," ta PCI-isa shisem.

DMHPDAAC-i Dibang Multipurpose Hydro Project tebilemtsü lemsatep

Itanagar, Luroi/August 23

(Agencies): Dibang Multipurpose Hydro Project Downstream Affected Area Committee (DMHPDAAC)-i Arunachal Pradesh nung multipurpose dam project tem yanglutsü benoka aliba anemba metetdaksüogo aser ashiba agi, iba ajanga Assam aser Arunachal Pradesh naprongla nung ayonglanglen alirtem dak kongshitsü.

Sadiya nung osangbenertem den sensaksemba mapang DMHPDAAC lenirtemi ashiba agi, Roing Deputy Commissioner indang Office ajanga tetuyuba agütsüba ajanga parnok longkak aitba tesem ya Assam-i belener

aotsüsa aküm. Parnoki ashiba agi iba ya democratic movement ka remseptsütsü merangba lir.

Committee-i, Dibang Multipurpose Hydro Project ajanga Assam kübok tesem balala aser talisa Sadiya tesem aser Arunachal kübok Dibang Valley kanga amokmerener.

Parnoki ashiba agi, Centre aser state sorkar napronglai iba tesem nung alirtem tagidak maka ama züngshir, ali, kiojen aser biodiversity raksatsür aser kasa mapang nung parnok kümzüka metoktsür aser tajangzüka magütsür.

DMHPDAAC-isa, project dak sendakba nung teyazü tenangzüka agüja nüburtem

anisaba atema National Hydroelectric Power Corporation (NHPC) aitsüogo.

Iba telok yagi ashiba agi, parnok Arunachal Pradesh sorkar nem ali temenok sen crore 215 agütsüogo, saka senotsü ya Dibang district nung aliba nüburtem tajangzüka atema mamshi lir.

Maneni DMHPDAAC-i ashiba agi, "tanü onok ya Arunachal nung third-class lisopur ama amshir. Onok democratic temeden metetdaksütsü aser onok libaliro kümzüka ayutsü atema onok refugee tem ama tanga state ka nung osangbener den sensaksem sentong ayongzüka agitsüsa akümer."

Temesepba mozü achiba ya state atema amokmeren tulutiba lir: Mizoram CM

Aizawl, Luroi/August 23

(Agencies): Mizoram Chief Minister Lalduhoma-i, temesepba mozü achiba ya state atema amokmeren tulutiba lir ta ashiba den, iba tebilemtsü ya bentettsü atema ajak longjemmer inyaktsüla ta ashi.

Aizawl nung Mizoram Police Service Association (MPSA) conference nung o jembiba mapang pai temesepba mozü aser HIV/AIDS prokshia aoba tesendaktep indang jembia liasü.

"Temesepba mozü achiba ya

asenok atema amokmeren tulutiba lir. Longjemmer inyakba ajanga iba amokmeren ya nokdangba dang masü saka HIV prokshia aoba dena nokdangtsü," ta Lalduhoma-i ashi.

Chief Minister-isa, temesepba mozü anema raraba aser state yimjung nung toktsüba nung tongtibang shilem agiba atema Mizoram Police Service (MPS) officer tem nem tenüngsang agüja liasü.

Lalduhoma-isa, sorkari ochi mashi inyakyim anema jenjang

balala agiba aser tawa constable 256 shimba indang lemsatep, koba pai ashiba agi state nung kecha ochi mashi inyakyim medeni shimshiba maparen ka liasü.

Maneni CM-i police officers tem dang Mizoram yimjung nung toktsütsü aser terenlok atema meranga inyaktsü ajungshia liasü. Iba sentong nung Home Minister K. Sapdanga aser Mizoram Police Service Association nungi züngsem 139-i shilem agia liasü.



Guwahati: Assam, Dima Hasao district nung Umrangso police station kübok National Highway 29 nung Lanka-Garmapani tsüngda Hokolbarnü nikongtsütsü gari ka tsükokba sülen nisung ana asü aser pezü yirua liasü. Lanka leni oya aliba khu abenba gari kati tanga gari ka ajateta aotsü merangba mapang gari mazüokteti tsükoka liasü.

Russia-i yimjung asoshi senden mamentsü meranger: Zelenskyy

Kyiv, Luroi/August 23 (Agencies): Rara tembangsü meranga Vladimir Putin den senden amentsü aliba nokdangtsü asoshi Russia-i akokba mapa ajak inyaker, ta Ukraine Tir Volodymyr Zelenskyy-i tai tongloksü.

US Tir Donald Trump-i lenir ana ya ajurutepdaktsütsü meranger, saka Hokulbarnü pai 'ibaji totzü aser vinegar ama lir, tena kangabo meputep' ta ashi.

Senden amentsü asoshi agenda renemba mapang Ukraine lenir ajurutsü Putin renema lir, saka iba agenda ya merenem aser Zelenskyy-i ajak nung mah ta ashir, ta Russian Foreign Minister Sergei Lavrov-i ashi.

Hopta ka shi kanga meranga jembishinüa arudang Trump-i Alaska nung Putin den mezüing ajurutep aser iba sülen Washington nung Zelenskyy aser European lenirtem ajurua liasü aser iba sülen US tiri iba rara ya pai anendaktsütsü merangba rongnung tasaktiba lir ta ashi.

Trump-i Hombarnü Russia lenir den phone ajanga jembiba sülen Putin-Zelenskyy senden amentsü aser pa khien lir oa adentsü asoshi achayanga liasü.

Ukraine tir-ia ibaji junger ta agizük, saka yimjung tezüngzüktep yanglutsüsa kumra tarutsü nung Russia-i amakba nungi nokdangtsü mechi Western allies nungi pai security guarantees meshia liasü. "Russia ama masü, Ukraine yabo lenirtem tsüngta senden amentsü tsüboa mali," ta Zelenskyy-i ashi.

NATO Secretary General Mark Rutte-i Kyiv semdangba mapang, Trump-i mangatettep aliba bentettsü nükjidong lir aser Putin-i tarutsü nung kodanga Ukraine tanaben

memakdaktsütsü asoshi US aser Eurpoe ajanga security guarantees tashi tait agütsütsü asoshi inyakteper, ta shia liasü.

Rutte den külemi jembidang, Ukraine indang security guarantees ya NATO indang Article 5 ama aginer, ta Zelenskyy-i ashi, koba ajanga alliance züngsem ka dak amakbaji NATO züngsem ajunga dak amaker ama züngshir.

"Ibai maparen tuluka asoshi tetenzüker lir, aser ibai temela masü, kechiaser guarantees nungya asen partners temi Ukraine nem kechi agütsütsü aser Ukraine army komaka alitsüla, aser army tem tashi aittsü asoshi maongka angutsü dena lir," ta Zelenskyy-i ashi.

Rutte-i iba guarantees tajungba kumdaktsütsü asoshi Ukraine den inyaker aser parnoki akok tashi Ukraine mitkar tashi tait kumdaktsüba nung rangloksü aser yangji Western security commitments dena lir, ta ashi. Tang iba indang tatem kuma jembitsü tali kerara, ta pai ashi.

Taoba mapanga security guarantees ya yanglua liasü, saka mamshi. NATO secretary general-i 1994 Budapest Memorandum ama taoba agreements nungi shisatsü nguogo ta ashi, kong Ukraine-i nuclear nok-nü meyanglutsü mulung aser iba melen Russia, US aser UK ajanga par tarutsü security asoshi "assurances" agüja liasü.

Tang tesüsa yimten lenirtemi merangba nung tamang kangabo makaba Ukraine nunger dang kechi ashitsü ta asüngdang dang, "Ni jaksar alitsü ako, saka Washington-i takok ka angu ama bilemer," ta Zelenskyy-i langzü.

"Kechiba süra, Ukraine-i

security guarantees nüngdaker. Saka US medeni Europe-i asenok nem akokba ajakbo magütsütettsü. Ya komaka tembangtsü ni memetet saka ibai hopta ka mesüra ana jakdang aliba dang nungi kanga agi tajungba," ta Ukraine tiri ashi.

"Asenoki Washington nung telungjem nguogo. Ibai yimtenren tsütsü dang süaka, security guarantees atema inyaker ajunga asoshi mezüngbuba mera dang lir."

Ajisüaka Russia indang foreign minister dak senden amentsü asoshi teimla maliba ajitet, shibai NBC News dang "senden kecha amentsüa sentong yanglua mali" ta ashi.

Taoba hopta Alaska nung US-Russia senden amendang Trump-i benokba ken o aika nung atsü-anem akatsü Russia-i mulunga lir, ta Sergei Lavrov-i ashi.

Ajisüaka iba sülen Washington nung senden amenba mapang Ukraine dak atsü-anem akaba majitet, ta pai tai tongloksü aser yimjung tezüngzüktep asoshi terenlok aliba nung Ukraine-i tetsükdaktsü agütsür ta tenüng asen.

Principles kar agizüksüla ta Washington-i amangba nisung ajaki meteta lir. Yangji Ukraine nem NATO züngsem magütsütsü aser litsü-lika otsü asoshi jembishinütsü lir, kong Zelenskyy-i ajak nung mah ta ashir, ta Lavrov-i ashi.

Aji masüadang EU foreign policy chief Kaja Kallas-i BBC dang ashiba agi, Putin-i Ukraine nungi litsü-lika aginer aser ibai sang ka lir, kong Putin-i asenok tetsüng ajemokdaktsüner.

"Russia-i kecha nunga atsü-anem makaba asenoki amadoker aser yangi tashiyim amshirji parnok lir," ta Kallas-i ashi.

India-Pakistan rara ni anendaktsü: Trump

Washington, Luroi/August 23 (Agencies): US Tir Donald Trump-i Oval Office nung "Right About Everything" ta zülua aliba korang ka semer ano maneni India aser Pakistan tsüngta "nuclear war" ka anendaktsüba tenüng agia liasü.

Trump-i aiben tenüng agiaka New Delhi-i khenyongi magizüker aser Operation Sindoor nung takoksa tulu ajuruba sülen Pakistan-i ceasefire alitsü lenmang bushi ta ashir.

Honibarnüa Trump-i, "Asenoki India aser Pakistan tsüngta nuclear war ka asütsüba aliba angatetteptsü. Nuclear war ka asütsü renema liasü," ta ashi.

Trump-i May 10 nü social media nung aonung mapang talangka jembishinüba sülen India aser Pakistan tsüngta ceasefire alitsü asoshi Washington tetsüngtai ai ta sangdongba sülen pai 40 ben dak tema kidanger linük ana

tsüngta mangatettep adoka aliba bentettsüba nung pai yari ta shijen shia arur.

Ajisüaka India-ibo Pakistan den ceasefire agreement yangluba ya linük anaprong army indang Directors General of Military Operations (DGMOs) tsüngta indang-indanga jembishinüba ajanga lir ta ashir.

Ato Kilonser Narendra Modi-ia Parliament nung Operation Sindoor anenba nung bendanger lenir shingaia shilem agia mali aser telemtetba ya India kisüangi agi, ta nenshia ashi.

Ukraine nung tang teraradak aliba atema osangbener den jembidang, Trump-i hopta ana tsüngta kanga tongtipang telemtetba agitsü aser yangji Moscow nem temerenshi/tenokdangba mesüra tariffs tesashi meshitsü, mesüra Kyiv dang ibai Washington indang rara masü ta ashitsü, ta ashi.

"Hopta ana nung ni koleni aotsüar asenoki metettsü...

sanctions tesashi mesüra tariffs tesashi mesüra anaprong, mesüra asenoki kecha meinyaktsü aser ibai ner rara ta ashitsü," ta Trump-i ashi aser Russia Tir Vladimir Putin aser Ukraine Tir Volodymyr Zelenskyy tsüngta tejak o tejak jitepa senden amentsü ajungshi.

"Tango (tsüingsang tabu ka) atema nisung ana nüngdaker. Ni nisung ana denji senden ka menner. Parnoki majurutepra, aji kechiba, ni parnok dang senden amentsü shiogo."

"Ni rara tenet anentsüogo aser pre-wars indanga züngshiti süra, asem lir, anungji rara ter... Ni mepelar. Hopta ana tsüngta koleni aotsüar metettsü," ta US tiri ashi.

Temaba jenjang nung jembishinütsü nüngdakba ajunga jelia mongintem aser minister temi bentetra Putin-i Zelenskyy ajurutsü mulunga lir, ta Russian Foreign Minister Sergey Lavrov-i ashiba sülen Trump-i iba o ya ashi.

Gaza City nung ayawara ya meimchir tamakok: UN chief



U. N. Secretary-General Antonio Guterres

New York, Luroi/August 23 (Agencies): Gaza City aser temeket teseitem nung

ayawara tejangja aliba ya meimchir tamakok lir, ta United Nations tekolakbai ashi.

UN-i yariba telok, kobai alima tesem ajunga nung yasa-tzüraba jangjar, paroki iba territory nung chiyongtsü agi anüng-apongba ya Phase 5 nung yuja lir, koba tematiba aser tamajungtiba alitsü.

Antonio Gutteres-i iba tensa ya nisung-i yangluba lir ta ashi.

Gaza nung nisung million tesadang ka dak tema yasa-tzüraba, pei tepok mesüngtetba aser asüba tensa tia tamajung nung lir, ta Integrated Food Security Phase Classification (IPC) ajanga ashi.

Israel-ibo iba report ya ajunga tiazü ta ashi, shirnoki iba territory nung yasa-tzüraba mali ta ashir.

Israel-i tanen makai Gaza telungi teyari oset bener aiba nokdanger ta UN-i ashir, koba Israel-i magizüker.

Israel-i yamaji masü ta ashiba ya humanitarian telok 100 dak tema, oa tenüng kuli alirtem, UN tentet balala aser UK densema Israel indang tembar linük aikati ashiba den meputeper.

Tangsa telangzüba tulu nüngdaker, aji mesüra ayawara dak sendakba nung asüba magizüktettsüsa tali akumtsü, ta IPC ajanga ashir.

August ita tiyongtsü aser September ita tatem tsüngta ayawara ya Deir al-Balah aser Khan Younis tashi aotsü ta parnoki takzüa lir.

Iba mapang nütsüng yongsük shime asem jungnüa - nisung 641,000 jungnüa - IPC Phase 5 nung tensa tamajungtiba ajurutsü aser IPC Phase 4 nung "emergency" tensa ya nisung

1.14 million mesüra nütsüng yongsük shilem 58 tashi akumtsü ta ashir.

June 2026 tashinung tila tanur nüngdakba achi-ajemtsü agi anüngba ajanga arishi küm pongu tekübok tanur 132,000 dak kongshitsü ta report nung takzüa lir.

Rara tenzükbä sülen nisung 271 yasa-tzüra süogo aser yangji tanur 112 lir ta Gaza nung Hamas meyong health ministry ajanga ashir.

IPC ya 2004 nung amenokba sülen tesüiba mapang ayawara pezü dang sangdonga lir aser tesüsabaji 2024 küm Sudan nung sangdong.

IPC ajanga ayawara mesangdongteter - koba yimya agi sorkar mesüra United Nation ajanga ang sangdonger.


"Gaza nung tensa tia rasatsü ojang maliba mapang tasen ka bendenlokogo: 'ayawara'," ta UN Secretary General Antonio Guterres-i ashi.

Ibai mejangjaba ka masü saka nisungi yangluba teraksa, meimchir-i tamakok ajuruba lir, ta pai ashi.

Israel Ato Kilonser Benjamin Netanyahu-i sangdong ka nung, "Israel dak yasa-tzüraba indang policy mali, Israel dak yasatzüraba nungi nokdangtsüba policy lir. Rara tenzükbä mapang nungi Israel-i chiyongtsü 2 million tons Gaza Strip telungi bener odaktsüogo, koba nisung shia ton ka dak tema lir," ta ashi.

Hamas-i anir 2023 küm October 7 nü Israel south tsütsü maka nisung 1,200 shi tepseter ano nisung 251 pua bener aoba nung langzüa Israel mitkari Gaza amak tenzükbä ajanga Gaza nung nisung 62,122 tepsetogo, ta Hamas meyong health ministry ajanga ashir.

Asian Shooting Championship: Arjun aser Elavenil nati gold angu



Arjun & Elavenil

Luroi/August 23, 2025 (Agencies): Shymkent, Kazakhstan nung tang asaya aliba 16buba Asian Shooting Championship nung Honibarnü India nunger shooter Arjun Babuta aser Elavenil Valarivan nati 10m air rifle mixed team asaya nung gold medal nguogo.

India nunger tarep yagi final nung China nunger tarep Dingke Lu aser Xinlu Peng na 17-11 agi koka liasü.

Arjun aser Elavenil nati point 9.5 aser 10.1 ngua asaya tenzük, saka iba sülen tajungba asayteta China nunger tarep ya koka liasü.

Iba asaya nung gold medal

anguba densema Elavenil-i iba asayamung nung gold medal tanabuba nguogo. Lai Hokolbarnü women's 10m air rifle individual event nung point 253.6 ngua gold medal ngur liasü. Iba asaya nung lai China tsür Peng Xinlu (253.0) aser Korea tsür Kwon Eunji (231.2) na ajateta tang mezüngbuba continental champion kümogo.

Elavenil, shiba Tokyo 2020 aser Paris 2024 Olympics naprongla nung asayaogo, lai la ya Asia nung shooter tem rongung tajungtiba ka ta kuli agütsüogo.

Tebur 10m air rifle team nung Arjun Babuta, Rudranksh

Patil aser Kiran Jadhav nungeria iba asayamung tetenzüklen gold medal nguogo.

Tetsür team asaya nung Elavenil-i, Mehuli Ghosh aser Ananya Naidu na den longjemer bronze medal ngur liasü. Mehuli Ghosh ya individual women's 10m air rifle final nung pezübuba nung tembang.

Iba asaya nung India team-i gold 21, silver 8 aser bronze medal 10 ngua parnok temaba jenjang nung lir. Parnok sülen China team tanabuba jenjang nung lir. Parnoki gold teku ngua ajak senteper medal 19 ngua lir.

Messi-i aniba Argentina team Nov ita Kerala nung asayatsü



Luroi/August 23, 2025 (Agencies): Kerala Sports Minister V Abdurahiman-i Honibarnü sangdong ka ajanga World Cup tesüsabuba koker aliba Argentina team den nüngtugu asayar Lionel Messi taküm November ita FIFA friendly ka asayatsü atema Kerala-i arutsü, ta metetdaksü.

Argentina Football Association (AFA)-i Lionel Scaloni-i achaayangba national team 2025 küm tatemlen United States nung October 6 nungi 14 tsüngda aser Luanda, Angola, aser Kerala nung November 10 nungi 18 tsüngda friendly asayatsü ta jangjatsüba sülen iba osang ya sangdonga liasü.

"Argentinian national football team-i parnok November ita FIFA window mapang Kerala nung asayatsü ta sangdongogo. Lionel Messi lenisüba nung World Cup akokba team idaki asayatsü. Onoki iba

atema Argentina Football Association dang kanga pelar. Kerala football aser saisabong sector ajak atema iba ya otsüsütsü ka asütsü," ta Abdurahiman-i ashi.

Osangbenertem den sensaksemba mapang minister-i ashiba agi, state-i AFA dang iba asaya ya 2026 küm masü saka taküm asayatsü mepeshia liasü.

"Mezüngbo AFA-i iba asaya 2026 küm asayatsü sentong yanglur liasü. Ajisüaka onoki parnok den tongtepratepa Kerala nung iba asaya taküm asayatsü mepeshia liasü. Tang AFA-i officially osang jangjatsüogo. 2022 World Cup akokba Argentina squad anir arutsü onok tebilemba lir," ta pai ashi.

AFA sangdong nung Messi indang mejeta shisema mali, saka minister-i pa-a arua asayatsü imlaba lemsatep. "Fan tem nem Kerala nung Messi

asayaba reprangdaksütsü onok tebilemba lir," ta pai ashi. Paisa, iba asaya atema state nung football asaya meimer lakh aika yongyatepa atadar, ta ashi.

Maneni paisa, Union Sports Ministry aser Reserve Bank of India-i iba asaya agizükogo aser sorkari tetuyuba agüjatokogo.

Parnok shirnok den asayatsü iba indang jembiba mapang pai, "onoki FIFA top 50 nung team ka shimtsü. Team aikati onok den tongtepratepogo. Australian football team-i tejangraba aliba lemsatepogo. Kasaji team ana asem katia onok den tongtepratepogo," ta ashi.

Argentina team tang agi tanabenbuba India nung asayatsü lir. Parnok 2011 küm Venezuela den Kolkata nung Salt Lake Stadium nung asaya aser iba mapang Messi-i goal ka idakja parnoki asaya goal 1-0 agi koka liasü.

Trump-i 2026 World Cup draw indang metetdaksü

Luroi/August 23, 2025 (Agencies): 2026 men's World Cup atema draw Washington nung taküm December ita asütsü, ta US tir Donald Trump-i sangdongogo.

2026 küm iba asayamung ya United States, Canada aser Mexico nung asayatsü aser taoba mapang team 32 asaya aliba taruba kümbo team 48 asayaba angutsü.

Draw ya 1994 küm US nung World Cup ayongzüka asayaba mapang ama Las Vegas nung asütsü imla liasü.

Ajisüaka December 5 nü draw ya Kennedy Center nung asütsü, kong Trump mendenbuba lir. Kennedy Center ya performing arts venue ka lir.

"Iba ya alima nung asayamung tulutiba asütsü," ta Trump-i ashi.

Fifa tir Gianni Infantino,

shibai World Cup trophy bener arua liasü, pa-a White House kübok Oval Office nungi draw indang osang agütsüba sentong nung densema liasü.

"Draw ya alima ajunga nung live sayutsü aser nisung billion kati reprangtsü," ta Infantino-i ashi.

"Asayamung nung team 48 asayatsü. Ajak senteper asaya 104 - Super Bowls 104 asayatsü," ta paisa shisem.

Hokolbarnü osangbenertem den sensaksemba mapang Infantino-i WC trophy amtsü atema Trump nem maongka agüja liasü.

Draw mapang team 48 telok 12 kuma lemsaba angutsü. Telokshia team pezüzü alitsü. Telok ajak nungi temaba jenjang nung tembangba team anana aser tasembuba jenjang nung tembangba tajungtiba team pezü knockout stage-i aitsü.

England den T20 asayamung atema Miller, Maharaj, Ferreira shimogo

Luroi/August 23, 2025 (Agencies): Taruba ita England den white-ball asayamung ka asayatsü aliba atema South Africa-i T20 squad nung David Miller, Keshav Maharaj aser Donovan Ferreira nung züngoksemogo.

Middle-order batter Miller aser arishi küm 35 tain spin bowler Maharaj na tawa Australia den T20 asayamung nung shilem magi, koba parnoki 2-1 agi makok.

Ferreira ya SA team nung tatemsa December ita asayaogo, saka pa summer's Hundred competition densema franchise cricket nung kanga junga asaya arudar.

South Africa team UK nung oa ODI asem aser T20 asem asayatsü, koba September 2 nü tenzüksü.

All-rounder Marco Jansen, 25, aser fast bowler Lizaad Williams, 31 nata tawa yiruba ajanga masayatetba sülen tang team nung züngksemogo.

Lanur fast bowler Kwena Maphaka, Kagiso Rabada cover ama ODI squad nung züngksemogo. Rabada ya tetsüng yiruba anepaluba mapang lir. Rabada ODI squad den aotsü aser pa T20 asaya asem nungbo asayatsü imlar.

Asayamung nung mezüngbuba ODI asaya Headingley nung September 2 nü asayatsü.

England vs South Africa fixtures & squads
September
21st ODI, Headingley (d/n) (13:00 BST)
42nd ODI, Lord's (d/n) (13:00 BST)
73rd ODI, Utilita Bowl, Southampton (11:00 BST)

10 1st Twenty20 international, Cardiff (d/n) (18:30 BST)
12 2nd Twenty20 international, Emirates Old Trafford (d/n) (18:30 BST)
14 3rd Twenty20 international, Trent Bridge (14:30 BST)

England ODI squad: Harry Brook (captain), Rehan Ahmed, Jofra Archer, Sonny Baker, Tom Banton, Jacob Bethell, Jos Buttler (wk), Brydon Carse, Ben Duckett, Will Jacks, Saqib Mahmood, Jamie Overton, Adil Rashid, Joe Root, Jamie Smith (wk).

England T20 squad: Harry Brook (captain), Rehan Ahmed, Jofra Archer, Tom Banton, Jacob Bethell, Jos Buttler (wk), Brydon Carse, Liam Dawson, Ben Duckett, Will Jacks, Saqib Mahmood, Jamie Overton, Adil Rashid, Phil Salt, Jamie Smith (wk), Luke Wood.

South Africa ODI squad: Temba Bavuma (captain), Corbin Bosch, Matthew Breetzke, Dewald Brevis, Nandre Burger, Tony de Zorzi, Keshav Maharaj, Kwena Maphaka, Aiden Markram, Wiaan Mulder, Senuran Muthusamy, Lungi Ngidi, Lhuan-dre Pretorius, Kagiso Rabada, Ryan Rickelton, Tristan Stubbs.

South Africa T20 squad: Aiden Markram (captain), Corbin Bosch, Dewald Brevis, Donovan Ferreira, Marco Jansen, Keshav Maharaj, Kwena Maphaka, David Miller, Senuran Muthusamy, Lungi Ngidi, Lhuan-dre Pretorius, Kagiso Rabada, Ryan Rickelton, Tristan Stubbs, Lizaad Williams.

BILEMDANGANG

"Tsüngküm mongpu koda melenshir yamaji taküm tia-a melenshir."